

皇
清
經
解
續
編

皇清經解集編

皇清經解續編卷

南菁書院

經說略二

定海黃以周元同著

釋徹

徹廣八尺鄭注言之詳矣而車人職云徹廣六尺鬲長六尺江
 慎修戴東原竝謂大車之輪必出於箱外其間須容輪轉徹廣
 不能與鬲長同數六尺當八尺之誤如其說鄭注車人當直破
 之矣如謂鄭所見本作八尺誤在賈氏作疏前則鄭注匠人諸
 職可直據八尺記文何必歷敘輿廣幅內幅廣綆轄之數而後
 定之乎其必一一排比而後定者鄭所見記文作六尺非八尺
 也既主八尺之說而記文六尺不終破之者鄭固不以爲誤也
 車人言大車等牝服之長與輿人參分車廣去一爲隧既異大



車等之廣亦必有異於輿人而記不言輿廣終記之曰徹廣六

尺所以明輿廣也

六尺之軌內除大車轂六寸羊車轂七寸柏車轂九寸又各除轂距鉤半寸纁寸則牝服

之廣大車四尺五寸羊車四尺二寸柏車三尺九寸也

輿博而轂短輿狹而轂長又悉限

以六尺之軌車人所言自有依據乘車之輿廣隧深見於記文而軌定八尺鄭注亦無可易蓋乘車兵車爲廣方廣方之軌宜八尺大車柏車羊車爲長方長方之軌自六尺六尺之軌軌於畛八尺之軌軌於涂故鄭注遂人曰畛容大車涂容乘車二者分別言之正見軌有大尺八尺之異無可混也後之申鄭者讀匠人注不讀遂人注遂疑一涂不能有兩軌必遵注而破記豈鄭君之意邪程易疇攷車制最好武斷於此多方測筭卒不能定亦昧於畛涂異軌之故也王倬夫又謂輿人參如一之車廣

爲兩輪之廣兵車田車乘車三等其兩輪廣皆六尺六寸大車
柏車羊車三等其兩輪廣皆六尺如其說車廣爲兩輪廣則下
句參分其廣去一以爲隧亦可謂之輪深乎如仍以隧爲輿深

則鄭注以車廣爲輿廣其說自不可破王氏好與鄭難立說固
未見當一涂兩軌說同江程尤非後人所敢信也

王說之謬余於通故中詳

駁之或曰畛一軌涂又一軌兩軌非同出於一涂信然矣然軌既

不一何以謂之同軌乎曰行畛者皆遵六尺之軌行涂者皆遵
八尺之軌尙謂非大同之治乎書有六書不害其爲同文倫有
五倫不妨其爲同倫而謂軌有兩軌遂不得謂之同軌乎學者
知畛涂之各有一軌可無疑於車人之文知畛涂之同遵一軌
亦可無疑於中庸之義矣

釋度

度者度也所以度物也尺寸尙矣然銖而稱之至石必過寸而度之至丈必差故又作步仞軌雉諸法以便民事第制同而實異彼此牴牾不相合同一步也而有六尺八尺之別焉同一仞也而有七尺八尺之異焉同一軌也而有八尺三尺三寸之分焉同一雉也而有三丈一丈之殊焉苟無以定之幾何不等於無星之稱輕重莫知也歟古者布指知寸運肘知尺展兩足則知步步必六尺申兩手而知仞仞必八尺此定名也司馬法曰六尺爲步步百爲畝周制如此夏殷之制亦同而王制謂古者以周尺八尺爲步以殷步之縱言之步之橫必六尺三代未之有改而縱則隨時而易焉殷一夫之田七十畝其步之縱必用

八尺始合步百爲畝之制

見田制異同攷

此古今之異制亦縱橫之不

同也仞與尋同爲八尺而分度廣度深之異仞字从人以人身爲度攷工記曰人長八尺故八尺曰仞尋字从彡彡卽手人伸兩臂亦八尺故八尺又謂之尋用以度廣取伸臂之名用以度深取身中之名故方言曰度廣曰尋杜預曰度深曰仞攷古經傳未有以仞度廣者秦漢以後度廣亦謂之仞於是仞尋之義不分故許氏說文以尋解仞云仞伸臂一尋八尺或者又强爲區別於以有尋八尺仞七尺之分賈公彥曰書傳雉高一丈則牆高一丈祭義築宮仞有三尺除三尺之外只有七尺故知七尺曰仞然以古書核之仞實八尺豈度高與度深亦異數歟攷工記曰廣二尋深二仞謂之澮此以度廣度深之異名而別言

之非謂廣二八尺深二七尺也古者畎一尺遂二尺溝四尺洫八尺其制皆廣深相等亦廣深各倍於其前何得於澮獨異其制乎左氏昭三十二年傳仞溝洫洫深一仞溝深半仞若以七尺之仞言則溝不得言仞矣是度深用八尺之徵也應劭亦主七尺曰仞說其注漢書云五尺六寸爲仞以漢尺言漢尺較周每長二寸也若小爾雅四尺爲仞由誤解仞溝洫之文也軌本車轍之名其後用以度涂之廣而爲度物之名軌凡八尺此定名也而亦有以之度車之高者少儀曰祭左右軌範卽大御之祭兩軹祭軌考工記曰軹崇三尺有三寸則軌亦三尺三寸也鄭注曰軌與軹於車同謂軌之尺寸於車同軹故引大御文以解之見軹之高正當軌豈謂軌爲軹之專名乎少儀不曰祭左

右軼而曰軌者此古人曲辭之例也

汪容甫曰曲禮不云不殺而云不祭肺坊記不云不

無故殺之而云不坐犬羊春秋傳不云鶴視卿而云乘軒論語不云見上大夫而云冕者此辭之曲者也汪氏此說實開讀書之一門前儒不知此例而遂謂軌卽軼有轡頭之訓矣

詩邶風曰濟盈不濡軌毛傳曰由軼以上爲軌毛意軌之高正當軼故以軼言之攷工記曰驚馬之軼深三尺有三寸是也水濡軼上則入輿輿者人所居也故不可濡不濡軌謂水在軼以下則濡軌者由軼以上矣經傳本無誤也前儒疑軼以上爲軌而改經文軌字爲軼以致古韻有不協近儒又疑軼以下爲軼軼卽軌而改毛傳由軼以下爲軌則經文濟盈不濡軌直似自轍至軼無一可濡之物矣不幾於文不成義乎且毛意如果以軼當軌何不曰軼謂之軌而偏舉軼與軼之迤衰不正者而曲言之乎是則禮鄭注以軌當軼詩

毛傳以軌當輈皆以尺寸之高下言之非言車中之物是猶由
軻以上曰涉由帶以上曰厲而涉與厲非人體服之名也曲禮
曰國中以策彗郵勿驅塵不出軌軌亦以度言謂國中不得疾
驅其塵無過三尺三寸以上也穀梁傳車軌塵義亦同謂車行
有三尺三寸之塵也如必以軌爲車轍之道而道上卽塵矣安
有不出者乎雉之制有廣高之異於事尤明左傳疏引異義曰
古周禮及左氏說一丈爲板板廣二尺五板爲堵長丈高丈三
堵爲雉長三丈高一丈此定名也而詩箋引公羊傳曰五板爲
堵五堵爲雉雉長三丈則板六尺此與三堵爲雉之說不同而
鄭君乃以板六尺通之謂用一丈板五板爲堵三堵爲雉用六
尺板五板爲堵五堵爲雉板堵之制有不同而雉制則一也異

義又引戴禮及韓詩說八尺爲板五板爲堵五堵爲雉何休注
公羊傳又謂八尺爲板堵四十尺雉二百尺此甚無當於經典
鄭君嘗駁之曰左氏說鄭伯之城方五里積千五百步也大都
三國之一則五百步也五百步爲百雉則知雉五步五步於度
長三丈雉之度量於是定此可以闢諸說之謬矣鄭君又曰度
高以高度廣以廣雉制如此而軌仞諸制亦有高深縱橫之別
焉故具言之

釋孝

說文曰孝善事父母者从老省从子孝放也从子爻聲案孝與
季音義不同經傳中多混用之由後人尠見季習見孝而妄改
之也季放也放之言仿引申之有教化義

佩觿季季導義與教同說文教上所施下

所效放之言依引申之有保愛義放謂依之也詩箋依之言愛也楚辭注依保也孝訓依放

有保文侯之命曰追孝于堯文人追孝當作追孝謂追效之也

所謂追配于堯人也魯頌曰靡有不孝自求伊祜孝亦當作孝

謂無不法效之以求福祿也鄭箋國人無不法效之者皆庶幾力行自求福祿是也依俗解與上

文義此孝之正義也禮器曰堯授舜舜授禹湯放桀武王伐紂

時也詩曰匪亟其猷聿追來孝孝當作孝謂教化也詩言文王

築城作豐匪急其從己之欲聿追往世之教化禮引此詩者亦

言堯舜禹湯武王皆乘時有天下聿追往古之教化也依舊解於詩可

通於禮鄉飲酒義曰君子之所謂孝者非家至而日見之也孝

亦當作孝孝非家至而日見之匡衡所謂教化之流非家至而

人說之也舊說改孝作教周語曰宣王欲得國子之能導訓諸

侯者樊穆仲曰魯侯孝曰然則能訓治其民矣孝亦當作季謂魯侯能教導人也即上所謂導訓諸侯下所謂訓治其民也

依前

解上下文義不貫

此季有教導之義也大戴保傅曰仁者養之孝者繼

之孝當作季季之言愛也保也謂慈母養育之保母緇負之也

盧注謂保母也

表記曰威莊而安孝慈而敬使民有父之尊有母之親

如此而後可以爲民父母孝慈當作季慈言其威之莊而安民

尊之如父其保之慈而敬民親之如母也論語爲政篇臨之以

莊則敬孝慈則忠舉善而教不能則勸孝慈亦當作季慈言泄

之以莊則敬保之以慈則忠也臨之季之舉之教之文本一例

此季有保愛之義也孝从老省老亦聲屬幽侯部季得父聲字

屬宵部季之音義與孝迥異經傳中季竝譌孝注家竝未校讀

循文立訓失之矣王氏伯申反據表記篇爲政篇之孝慈謂上之愛利民亦可謂孝其賤種此謬又如此

釋是

說文曰是直也从日正直爲本義引申之有正義通借之有實

義易未濟上九曰有孚失是是猶正也位不正故失是也

虞禮義

樂記曰禮樂頹天地之情

頹乃貌之或體今又誤爲傾

達神明之德降興上

下之神而疑是精粗之體疑與凝通凝猶合也是猶正也疑是

與降興對文言天地之神氣一降一興而萬物大小之形體皆

保合而各正也

鄭注精粗謂萬物大小也

易傳曰保合大和各正性命是也

是古通提太元元攤疑者提之注提正也太元之疑提卽樂記

之疑是也是又通寔寔又通實禮檀弓曰祥而縞是月禫徙月

樂是月實月也祥祭當卜二十五月下旬禪祭當卜二十七月

上旬

士虞禮疏禪月得行四時之祭則禪祭可從吉事先近日用上旬爲之

謂大祥後又匝一月

斯可禪祭也祥而縞是月禪卽士虞禮記所謂又期而大祥中

月而禪也中月者閒月也與學記中年考校同王子雍謂祥禪

同月非經意也魏書禮志引鄭志答趙商曰祥謂大祥二十五

月是月禪謂二十七月非謂上祥之月此說得之而是月爲實

月之義亦未明言也是月與徙月對文徙月樂謂禪祭後又踰

月也春秋僖公十六年正月戊申朔賈石于宋五是月六鵠遯

飛公羊傳曰是月者何僅逮是月也何以不曰晦日也據此則

是月卽實月自朔至晦適匝一月也是月或作提月

陸氏釋文作是月今

注疏本何注曰提月邊也魯人語也提亦借字左氏家說重言

是月嫌同日也不如公羊之義

釋役

說文役戍邊也从殳从彳會意執殳巡行也引申之有實行義
禮表記曰恭儉以求役仁信讓以求役禮謂恭儉信讓以求實
行其仁實行其禮也役有實行義故字又通慤書洛誥曰享多
儀儀不及物曰不享惟不役志于享凡民惟曰不享謂禮不及
者志不誠慤於享凡民亦謂不享也鄭語曰正七體以役心言
正其外體誠慤內心制其外以養其中也役心與役志同義並
近慤役與慤一聲之轉

釋既

王氏懷祖曰終詞之既也已止之已曰終因而已然之已亦曰

終故曰詞之既也詩終風且暴終溫且惠終窶且貧終和且平
終善且有終其永懷又寤陰雨終與既同義故或上言終而下
言且或上言終而下言又說者皆以終爲終竟之終而經文上
下相應之指遂不可尋矣案經傳中凡言既△且△者既終也
且始也

且訓始詳見王氏釋詞

謂既終如此始又如彼也

墨子經說上自前曰且自後曰

已已猶既也

毛詩既△且△之詞字多用終終卽既也既亦終也穀

梁傳曰既者盡也盡者終也易坎五曰坎不盈祇既平祇大也
既終也坎不盈中猶未大大則終平也繫辭傳曰初率其辭而
揆其方既有典常既終也對初言之初率循其辭而揆度方向
終得易之常道也書堯典曰以親九族九族既睦言同姓之九
族終相和睦也梓材曰庶邦享作兄弟方來亦既用明德作及